

Poštovane gradske vijećnice i gradski vijećnici,

Čini mi posebnu čast i privilegiju biti gradonačelnik Sarajeva, jer ovu časnu i odgovornu funkciju su obavljali ljudi koji su ostavili duboki i neizbrisiv trag u historiji našeg grada.

Hvala vam na ukazanom povjerenju, podršci i uvjerenju da ćemo zajedno sarađivati i vrijedno raditi za dobrobit grada Sarajeva i svih njegovih građanki i građana. Vašim izborom preuzimam veliku odgovornost u rukovođenju, zaštiti i čuvanju materijalnih i nematerijalnih dobara, promociji i afirmaciji grada Sarajeva na domaćem, regionalnom i međunarodnom planu.

Vrijedno ćemo se zalagati i raditi na realizaciji i provedbi projekata i aktivnosti u sljedećim strateškim oblastima: urbanizam i kapitalni projekti, održivi razvoj, digitalizacija, ekologija, zaštita rijeke Miljacke, međunarodna saradnja, kultura i muzeji, obrazovanje i inkluzija, mladi, sport i udruženja, te saradnja sa svim nivoima vlasti.

Naše Sarajevo mora ostati grad sa dušom, ali i grad koji se razvija uz plan. Fokusirat ćemo se na uravnotežen urbani razvoj uz očuvanje kulturno-historijskog nasljeđa. Planiramo realizaciju kapitalnih projekata u skladu sa integrisanim urbanističkim pristupom koji će usklađivati moderne potrebe s duhom baštine. Poseban fokus stavit ćemo na unapređenje javnog prostora, ozelenjavanje grada, integraciju biciklističkih staza, povećanje dostupnosti dječjih igrališta i stvaranje sigurnih pješačkih zona. Savremeni izazovi urbanizma, poput nekontrolisanog rasta i pritiska na prostore starog grada i Baščaršije, traže planske odgovore koji balansiraju između razvoja i očuvanja identiteta.

U tom kontekstu uložiti ćemo napore u bolju koordinaciju urbanističkih planova, poštovanje struke, javne rasprave i transparentnost. Prioritetno ćemo raditi na revitalizaciji javnih površina uz istovremeno čuvanje zaštićenih zona. Participacija građana će nam biti u fokusu u svim procesima, zajednički stvarajući ambijent za razvoj u skladu s klimatskim ciljevima.

Grad Sarajevo je u 2024. godini privukao više od 7 miliona konvertibilnih maraka iz raznih fondova. Kroz rad Gradske službe za održivi razvoj jačamo ulogu Sarajeva kao lidera u evropskim projektima. Nastavljamo implementaciju preko 20 međunarodnih i lokalnih projekata u oblastima urbane mobilnosti, digitalizacije, energetske efikasnosti i upravljanja otpadom. Projekti poput Urban, Net Zero Mission Cities, Commit to Green, Bauhaus, Bites jasno svjedoče o pozicioniranju Sarajeva u evropskim tokovima. Naš cilj je da Sarajevo bude zelen, pametan i inkluzivan grad.

Kroz pilot inicijative poput nabavke električnog vozila za djecu s poteškoćama u razvoju, kampanje o smanjenju otpada od hrane, postavljanje senzora kvaliteta zraka i dekarbonizaciju stambenog sektora te ozelenjavanje javnih prostora pokazujemo kako evropska sredstva donose direktnu korist građanima. Nastavit ćemo razvijati digitalne servise grada, povećavati učinkovitost javne uprave i jačati povjerenje između građana i uprave uvođenjem inovativnih metoda učešća. Sarajevo mora biti laboratorij inovacija u lokalnoj samoupravi.

Vraćamo se višedecenijskom strateškom projektu „Čista rijeka Miljacka“, koji obuhvata infrastrukturne zahvate, ekološko uređenje obala, modernizaciju kanalizacionog sistema, izgradnju sistema za tretman otpadnih voda i edukaciju građana. Miljacka mora ponovo postati ponos Sarajeva i simbol života u skladu s prirodom. Ova inicijativa predviđa i koordinaciju s kantonalnim i drugim nivoima vlasti, uključivanje civilnog društva i partnerskih organizacija u edukativne aktivnosti, kao i izradu dugoročne strategije upravljanja vodotocima u skladu sa EU okvirnom direktivom o vodama. Cilj je ne samo čistija rijeka, već vraćanje rijeke u život zajednice.

Sarajevo će biti prisutno tamo gdje se odlučuje. Jačat ćemo saradnju s gradovima regiona i Evrope, razvijati smart city inicijative, zajednički aplicirati na fondove i razmjenjivati znanja i iskustva. Saradnju nećemo ograničiti samo na protokole i posjete, već ćemo razvijati konkretne projekte s gradovima poput Beča, Ljubljane, Zagreba, Istanbula, Barcelone, Ankare, Pariza, New Yorka i Washingtona. Sarajevo mora biti prepoznatljivo kao partner koji uči, ali i koji daje doprinos globalnim izazovima.

Oснаžit ćemo saradnju s dijasporom, učestvovati u evropskim mrežama poput EuroCities, C40, mreže kreativnih gradova UNESCO-a. Sarajevo će promovisati politiku mira, solidarnosti i klimatske odgovornosti. Uzet ćemo učešće na B40 summitu i iskoristiti priliku da pokažemo svoje potencijale i da se pozicioniramo u okviru ove i drugih međunarodnih značajnih mreža.

Kultura će biti u središtu javne politike. Poseban fokus stavit ćemo na infrastrukturu muzejskih ustanova, a naročito na realizaciju muzeja Ars Aevi. Ulažemo u institucije koje baštine identitet grada – Olimpijski muzej, Sarajevski spomenar, „Valter brani Sarajevo“ i druge. Podržat ćemo programe za djecu, mlade, osobe s invaliditetom i zajednice koje traže prostor izražavanja. Razvijat ćemo kulturni turizam, digitalizaciju zbirki i mobilne muzejske izložbe po četiri gradske općine. Planiramo uspostaviti kulturnu strategiju grada Sarajeva za period 2025–2030. Kultura nije luksuz, već osnova demokratskog, kreativnog i otpornog društva. Bez pamćenja nema ni vizije; bez kulture grad gubi dušu.

Obrazovanje je temelj jednakih mogućnosti. Grad će nastaviti ulaganja u škole, asistente u nastavi, stipendije i podrške za djecu iz marginaliziranih grupa. Kroz obnovu objekata, besplatne instrukcije, stipendije, opremanje škola – osiguravamo uslove dostojne svakog djeteta. Posebnu pažnju posvetit ćemo inkluziji djece sa poteškoćama u razvoju i romske djece, kao i edukaciji nastavnika u oblasti inkluzivne pedagogije. Proširit ćemo saradnju sa UNICEF-om i nevladinim organizacijama te raditi na programima ranog učenja i digitalne pismenosti. Sarajevo će biti grad jednakih mogućnosti za svako dijete.

Budućnost Sarajeva su mladi. Grad će nastaviti podržavati projekte zapošljavanja mladih, studentske i omladinske organizacije, neformalne grupe i start-up ideje. U sportu ćemo podržavati klubove koji rade s djecom i omladinom, sportiste koji predstavljaju Sarajevo, kao i sportske manifestacije koje promovišu grad. Udruženja koja njeguju volonterizam, tradiciju i ljudska prava imat će stabilnu podršku. Otvaramo nove javne pozive za omladinske i sportske projekte, razvijamo Centar za mlade i uključujemo mlade u savjetodavna tijela grada. Saradnja sa nevladinim sektorom biće oslonac za lokalni razvoj.

Saradnja sa kantonalnim, federalnim i državnim institucijama ključna je za realizaciju zajedničkih projekata. Otvoren dijalog, koordinacija javnih politika i međusobno poštovanje su temelj za napredak. Uložiti ćemo dodatne napore u sinergiju s općinama unutar Kantona Sarajevo i susjednim općinama. Nastavit ćemo zajednički rad na obrazovnim i kulturnim politikama, ali i na regionalnim projektima iz oblasti ekologije, turizma i infrastrukture. Gradska uprava će aktivno aplicirati na fondove Federacije BiH i Kantona Sarajevo, koristiti mehanizme saradnje s općinama i jačati međusektorsku koordinaciju.

Mandat koji započinjemo gradimo na povjerenju i partnerstvu s vama, vijećnicama i vijećnicima. Transparentnost, odgovornost i participacija biće temelj našeg djelovanja. Ovaj mandat ne doživljavam kao političku funkciju, već kao poziv na služenje građanima. Vjerujem da možemo djelovati kao tim – različiti, ali posvećeni istom cilju. Sarajevo zaslužuje više od prosječnosti. Zaslužuje viziju, red, pravdu i napredak. U ime svih koji vole ovaj grad, radimo zajedno da ga učinimo boljim nego što smo ga zatekli. Sarajevo je ozbiljan grad. Sarajevo je glavni grad države Bosne i Hercegovine.

Hvala vam na pažnji.